



Broj/ Број : 02/2-50-1-23-22/09

Sarajevo/ Сарајево: 12.2.2009. godine

ZAPISNIK

22. sjednice Komisije za vanjsku i trgovinsku politiku, carine, saobraćaj i komunikacije

Doma naroda

Parlamentarne skupštine Bosne i Hercegovine, održane 9.2.2009.

Sjednicu Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH (u daljnjem tekstu: Komisija) sazvala je predsjedavajuća Komisije Alma Čolo.

Sjednici Komisije, u svojstvu članova, prisustvovali su: Alma Čolo, Dušanka Majkić, Adem Ibrahimpašić, Rudo Vidović i Slobodan Šaraba, te Nenad Pandurević, sekretar, i Dobrinka Savić, stručni saradnik u Komisiji. Opravdano je odsustvovao Branko Zrno.

Sjednici su, u svojstvu predlagača i izvjestilaca, prisustvovali: Nikola Deretić, predsjedavajući Upravnog odbora, i Jakša Jurjević, vršilac dužnosti generalnog direktora Radio-televizije BiH, Namik Kupusović, koordinator jedinice za Koridor Vc u Ministarstvu prometa i komunikacija BiH, Sead Avdić, savjetnik u Ministarstvu vanjskih poslova BiH, i Zijad Sinanović, direktor sektora u Vanjskotrговинској komori BiH.

Sjednica Komisije počela je u 12 sati.

Nakon što je konstatirala da postoji kvorum, predsjedavajuća Komisije Alma Čolo za sjednicu je predložila sljedeći

DNEVNI RED

1. Usvajanje Zapisnika 21. sjednice Komisije;
2. Razmatranje Izvještaja o radu i poslovanju Radio-televizije BiH u 2007. godini;
3. Razmatranje Izvještaja Vijeća ministara BiH o aktivnostima na projektu „Autoput na Koridoru Vc“ i Plan narednih aktivnosti;
4. Zahtjev Ad hoc komisije za pripremu izmjena i dopuna, kao i prečišćenog teksta Poslovnika Doma naroda za dostavljanje mišljenja o odredbama Poslovnika Doma naroda koje se odnose na stalne komisije Doma naroda Parlamentarne skupštine BiH (čl. 25.-28.);
5. Razmatranje zahtjeva Komisije za vanjske poslove Predstavničkog doma PSBiH u vezi s davanjem prijedloga člana Koordinacionog tima za izbor BiH za nestalnu članicu Vijeća sigurnosti UN-a za 2010. godinu;

6. Tekuća pitanja

- Zabilješka sa sastanka Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH s novoimenovanim šefovima diplomatsko-konzularnih predstavništava BiH, 28.1.2009.

Predloženi dnevni red usvojen je jednoglasno.

1. Usvajanje Zapisnika 21. sjednice Komisije

Zapisnik je usvojen jednoglasno.

2. Razmatranje Izvještaja o radu i poslovanju Radio-televizije BiH u 2007.godini

Na početku je predsjedavajuća Komisije Alma Čolo podsjetila na zakonski osnov za dostavljanje i razmatranje izvještaja Radio-televizije BiH. Naglasila je da je Zakonom o Javnom radio-televizijskom servisu BiH u članu 29. stav (1), tačka k) predviđeno da Upravni odbor Javnog radio-televizijskog servisa BiH „predstavlja Parlamentu i javnosti godišnje finansijske planove i planove programa i izvještaje o realizaciji tih planova“.

Dalje je podsjetila prisutne da je predsjedavajući Upravnog odbora Radio-televizije BiH svojim dopisom od 31.12.2008. dostavio Izvještaj o radu i poslovanju Radio-televizije BiH za 2007. godinu koji je sačinio menadžment RTVBiH, kao i Izvještaj o reviziji poslovanja Radio-televizije BiH za 2007. godinu koji je sačinila nezavisna revizorska kuća „Revsar“. Naglasila je da je u dopisu predsjedavajućeg UORTVBiH istaknuto da Izvještaj o radu i poslovanju koji je sačinio menadžment nije usvojio Upravni odbor jer je „revizorski izvještaj potvrdio velike prikrivene gubitke i nerealno prikazano finansijsko stanje.“

U nastavku je informirala prisutne da je Izvještaj o reviziji poslovanja razmatrala Komisija za finansije i budžet Doma naroda, kao nadležna komisija, na 27. sjednici, održanoj 20.1.2009., i da je tom prilikom usvojila pet zaključaka koje upućuje Domu naroda i predlaže njihovo usvajanje.

Predsjedavajuća je informirala prisutne da je i Komisija za saobraćaj i komunikacije Predstavničkog doma razmatrala Izvještaj o radu i poslovanju RTVBiH za 2007. godinu i tom prilikom prihvatila dva zaključka koje je uputila Predstavničkom domu. Naglasila je da Predstavnički dom još nije razmatrao Izvještaj i predložene zaključke Komisije, dodajući da će to najvjerojatnije biti na dnevnom redu njihove naredne sjednice, koja će biti održana 18.2.2009.

U nastavku je predsjedavajuća Komisije pozvala predsjedavajućeg Upravnog odbora Radio-televizije BiH da uzme riječ i članovima Komisije da kratko uvodno obrazloženje u vezi s pomenutim izvještajem.

Predsjedavajući Upravnog odbora Radio-televizije BiH je na početku izlaganja izrazio žaljenje što je izvještaj relativno kasno dostavljen Komisiji i dodao da su razlozi za to najvjerojatnije na strani Radio-televizije. U nastavku je dao objašnjenje zbog čega Upravni odbor nije prihvatio Izvještaj o radu i poslovanju Radio-televizije BiH. Izvještaj je prvi put razmatran na sjednici Upravnog odbora u aprilu 2008. godine, a nakon toga još na nekoliko narednih sjednica ali se nije uspjela postići saglasnost s menadžmentom da se postupi po preporukama revizorskog izvještaja. Te preporuke bile su veoma jasne i njihovim uvažavanjem osiguralo bi se da izvještaj bude mnogo realniji, pogotovo u onom dijelu gdje

su revizori tražili da se obaveze i potraživanja usklade po ročnosti, što bi dalo potpuno drugačiju sliku. Međutim, menadžment nije htio postupiti po zahtjevu Upravnog odbora. U augustu je stigao novi revizorski izvještaj nezavisne revizorske kuće kojim su potvrđene sve sumnje Upravnog odbora u pogledu realnosti finansijskog izvještaja. Zbog nalaza u revizorskom izvještaju, Upravni odbor nije usvojio izvještaj menadžmenta jer su smatrali da nemaju pravo proturječiti revizorskoj kući. Posebno je ukazao na dio izvještaja nezavisne revizorske kuće u kojem se navodi da: „U vremenu provedenom u reviziji nismo bili u mogućnosti utvrditi za koje iznose su akumulirani gubici potcijenjeni, odnosno dobici precijenjeni“.

Predsjedavajući Upravnog odbora je u nastavku posebno istakao da su revizori konstatirali 9,7 miliona KM prikrivenog gubitka, i izrazio sumnju da bi taj gubitak koji se sada tretira kao potencijalni mogao biti stvarni i u mnogo većem iznosu. Zamolio je članove Komisije da se kao rezultat ovog sastanka definiraju radikalniji zaključci, jer je situacija sada dovedena do apsurd. Međusobna dugovanja između Federalne radio-televizije i Radio-televizije BiH sada su se povećala na 8,7 miliona. Izrazio je uvjerenje da ne postoji način da se tih 8,7 miliona u nekom razumnom vremenu naplati. Istovremeno je naglasio da Upravni odbor nipošto ne želi da blokira rad Federalne televizije.

U nastavku se osvrnuo na situaciju u vezi s konkursom za izbor generalnog direktora i imenovanja vršioca dužnosti generalnog direktora. Sud BiH zaustavio je raspisivanje konkursa za izbor generalnog direktora s obrazloženjem da je imenovan vršilac dužnosti, da nije ugrožena funkcija rukovođenja i da nema potrebe žuriti a tim dok se ne završi sudski spor. Istovremeno, općinski registracioni sud ne želi da izvrši registraciju potpisa vršioca dužnosti generalnog direktora, a to je potvrdio i kantonalni sud i takva situacija traje već peti mjesec. Advokat gosp. Agovića odustao je od zahtjeva da se on vrati na posao. Sve ovo govori o tome koliko je situacija dovedena do apsurd. Podsjetio je i na posljednje reakcije sindikata koji je u prethodne dvije godine optuživao Upravni odbor. Radnici su sada shvatili koliko je ozbiljna situacija i uplašeni su da su napušteni od svih onih koji bi trebalo da im pomognu, uključujući i Parlament. Izrazio je sumnju da ovaj upravni odbor a ni bilo koji drugi može značajnije uticati da se situacija promijeni.

Jakša Jurjević je u svom obraćanju rekao da se već pet mjeseci nalazi na mjestu vršioca dužnosti generalnog direktora ali bez mogućnosti da bitno utiče na rad u Radio-televiziji BiH. I on je potvrdio da je situacija u Radio-televiziji BiH u posljednjih nekoliko mjeseci potpuno nejasna. Dodao je da su problemi veliki a naročito su velika dugovanja te izrazio sumnju u daljnje normalno funkcioniranje Radio-televizije BiH.

Duška Majkić podsjetila je na zaključke koje je usvojila Komisija za finansije i budžet prilikom razmatranja revizorskog izvještaja te dodala da taj izvještaj pokazuje da se agonija u Radio-televiziji BiH nastavlja. Dodala je da je na sjednici Komisije za finansije i budžet predlagala stečaj kao mjeru ozdravljenja. Ako se ta mjera ne preduzme na vrijeme, onda neminovno slijedi likvidacija. Stečaj znači da se broj ljudi, kojih je sada oko hiljadu, svede na razumnu mjeru, da se nađe način kako da se reguliraju sva potraživanja itd., jer drugog načina nema. Jednostavno nema novaca kojima bi se pokrilo ovakvo ponašanje kako se do sada ponašao menadžment Radio-televizije BiH.

Dalje je podsjetila na, po njenom mišljenju, ključne razloge zbog kojih Upravni odbor nije prihvatio izvještaj menadžmenta. Prvo, generalni direktor nije napravio plan konsolidacije preduzeća u skladu s preporukama revizije u kojima je u 40 tačaka rečeno šta je potrebno uraditi. Ponovo je istakla da nikad lošiji revizorski izvještaj nije ušao u Parlamentarnu skupštinu BiH. Drugo, Upravni odbor procijenio je da plan sanacionih mjera koji je pripremio generalni direktor nije dovoljno energičan, za što je rekla da predstavlja nepreciznu i rastegljivu ocjenu. Dalje je izdvojila sljedeća tri krupna problema zbog kojih

Upravni odbor nije usvojio izvještaj menadžmenta, a to su : gomilanje duga Federalne televizije prema BHRT-u, ekonomska nelogičnost u marketingu i nezakonitosti u primjeni Zakona o javnim nabavkama BiH. To je sve bilo konstatirano i u revizorskom izvještaju za 2006. godinu a sada je stanje u 2007. godini u svakoj od ovih oblasti još lošije, dug FTV se uvećava, prihodi od marketinga padaju za 40% i nastavlja se kršenje Zakona o javnim nabavkama BiH. Ukazala je i na druge propuste u radu generalnog direktora koje je Upravni odbor uzeo u obzir prilikom razrješenja, i to : imenovanje nosilaca najviših programskih funkcija koje je obavljao generalni direktor iako je to, po Zakonu o Javnom radio-televizijskom servisu (član 29.), nadležnost Upravnog odbora kao i donošenje akata preduzeća mimo znanja Upravnog odbora.

Kao jednu od krupnih zamjerki Upravnog odbora generalnom direktoru navela je da generalni direktor nikada nije stavio na dnevni red raspravu o satelitskom programu iako je to Upravni odbor od njega zahtijevao. Zatražila je pojašnjenje zbog čega je to bitno i kako bi to doprinijelo poboljšanju situacije u Radio-televiziji BiH.

Nikola Deretić je u svom odgovoru istakao da je iz medija saznao da Vijeće ministara BiH ne plaća zakup satelitskog linka i da to nije plaćeno ni do danas. Upravni odbor nije imao bilo kakav dokument o tome a to je bilo uvršteno u poslovne knjige. Na taj problem je ukazala i revizija. O tome ne postoji nikakav finansijski dokument osim navodnog usmenog obećanja ministra Ljubića. Ali to nije suštinski problem. Problem je što emitiranje preko satelita svaki mjesec pravi trošak od 50.000 €. Radio-televizija sada nema novaca da to plaća. Na dugoj strain, Upravni odbor niti smije niti pomišlja da zaustavi emitiranje preko satelita. Taj satelitski program ionako nije kakav bi trebalo da bude. To treba biti reprezentativan programski sadržaj prilagođen našoj dijaspori. Ovo što se sada emitira nije satelitski program nego zemaljski signal koji se šalje u inozemstvo, a satelit se istovremno koristi da bi se pokrili dijelovi zemlje u kojima nema zemaljskog signala. Trenutni dug za satelit je blizu 2 miliona maraka i već je dolazila predstavica slovenačke firme i obavijestila Radio-televiziju da namjeravaju podnijeti tužbu radi naplate tog duga. Dogovoreno je da se pokretanje tužbe prolongira za 45 dana. Upravni odbor obratio se pismom predsjedavajućem Vijeća ministara BiH. Međutim, na to pismo nisu dobili nikakav odgovor.

I pored svih ovih problema, bivši generalni direktor nikada nije prihvatio zahtjev Upravnog odbora da se ovo pitanje stavi na dnevni red. Istina, na jednu sjednicu je bivši generalni direktor donio izvještaj s novim projektom satelita u kojim se obraća Vijeću ministara BiH u ime sva tri emitera da se odobri plaćanje satelita. Međutim, Upravni odbor je tek kasnije saznao da druga dva emitera nikad o tome nisu konsultirana. Upravni odbor je sve vrijeme zahtijevao od generalnog direktora da se napravi analiza s komercijalnog, programskog i tehničkog aspekta o emitiranju programa putem satelita i podsjetio da jedna BN televizija godišnje ostvaruje oko 1,5 miliona od satelitskog programa a Radio-televizija BiH svega 160.000.KM.

Dužanka Majkić još je ukazala na ukupnu istuaciju u vezi s raspisivanjem konkursa za izbor generalnog direktora te imenovanja vršioca dužnosti, kao i na činjenicu da se već 13 mjeseci članovima Upravnog odbora iz Republike Srpske ne isplaćuje naknada. Osim toga, ukazala je i na problem obračuna plaća i plaćanja poreza i doprinosa na plaće. Posljedni obrazac M4 za plaćene doprinose podnesen je za 2006. s tim što za 2002. i 2003.godinu uopće nisu plaćeni. Pored toga, u 2007. godini uopće nije postojao sistem obračuna plaća. Kao veoma ozbiljan problem istakla je i činjenicu da je sva imovina Radio-televizije pod hipotekom. Na kraju je kazala da je pripremila zaključke koje će kasnije predložiti Komisiji na izjašnjavanje.

Adem Ibrahimpašić rekao je da će se njegova diskusija odnositi na stanje u BHRT-u sa aspekta poslovanja te da će se u drugom dijelu osvrnuti na to kako je do toga svega došlo. Ponovio je da je prikriveni gubitak oko devet miliona, što znači da se pozicija bez gubitaka održavala na teret likvidnosti. Gubitak sam po sebi nije problem, on se pokriva na teret kapitala. Suštinski problem koji ostaje jeste nedostatak novca. Da bi se došlo do novca, moraju se naplatiti potraživanja, naravno ako su ona vjerodostojna. Podsjetio je da je u svim raspravama o Radio-televiziji postavljao pitanje zašto se ne tuži FTV. To pitanje se nekad mora početi rješavati. Jedan od problema u dosadašnjem periodu bio je i taj što su svi direktori bili novinari i to je bio jedan od razloga zašto tužbe nisu podnošene jer su oni praktično svi ista kuća. Osim toga, takvi direktori su nedovoljno kompetentni za taj posao i oko njih se vrlo brzo okupi interesna grupa koja nastoji da ostvari svoje uske interese. Dodao je da Radio-televizija podnosi tužbe protiv onih koji ne plaćaju RTV taksu, pa zašto onda ne tužiti i FTV zbog njenih dugovanja. FTV ima svog osnivača i neka on vodi brigu o tome kako će se ta dugovanja namiriti. RTV ima svoja potraživanja i njihovom naplatom može osigurati likvidnost a gubitak pokriti na teret kapitala.

Dalje se osvrnuo na zahtjeve da se pokrene stečaj. Međutim, dodao je, ako je imovina pod hipotekom, onda je to problem povjerilaca, da li će oni i kada pokrenuti naplatu i tjerati preduzeće u stečaj, a ne mi politički da to sada guramo u stečaj. Radio-televizija BiH je zakonom osnovana i samo zakonom može biti ukinuta. Problem neplaćanja doprinosa prisutan je kod velikog broja bh. firmi i to nije nikakva specifičnost Radio-televizije BiH. Pozdravio je činjenicu da je u Radio-televiziju ušla finansijska policija i izrazio uvjerenje da će se time razotkriti kriminalane radnje, ako ih ima.

Postavio je konkretno pitanje - zašto je Upravi odbor svjestan da ne može naplatiti ništa od FTV-a, kao i zbog čega se ne smije zaustaviti satelitski program U odgovoru na postavljeno pitanje Nikola Deretić istakao je da je Upravni odbor pokrenuo sudske sporove. Utuženo je već tri miliona a ovih dana treba još da bude utuženo million KM. I ubuduće će sva dugovanja starija od šest mjeseci biti utuživana da ne bi zastarjela. Međutim, postavio je pitanje koga to Upravni odbor zaista tuži. U odgovoru na pitanje o satelitskom programu rekao je da značajan broj ljudi u BiH prati program preko satelita, i ukidanjem satelitskog programa jedan značajan broj ljudi u BiH ostao bi bez signala Radio-televizije.

Slobodan Šaraba istakao je da je suštinsko pitanje kako spasiti Radio-televiziju BiH. Podsjetio je na sve, kako je rekao, teške rečenice koje su već iznesene: „finansijski izvještaj nije realan“, „nikad gori izvještaj nije ušao u ovu kuću“, „ekonomske nelogičnosti u marketingu“, „izuzetno teško ponižavajuće i poražavajuće stanje kada su u pitanju članovi Upravnog odbora“. Dodao je da je stečaj jedini način da se spasi Radio-televizija, odnosno da bi se spasilo što je zdravo. Dalje je istakao da se treba poraditi na tome da se postojeći zakoni o RTV servisu i sistemu usklade sa Ustavom BiH i međunarodnim konvencijama. Kao posebno značajan problem izdvojio je marketinške agencije čiji položaj i rad treba biti uređen zakonom.

Rudo Vidović rekao je da nije prvi put da Komisija sluša ovakve diskusije i riječi o stanju u Radio-televiziji, jer ova situacija nije od jučer. Zapravo, situacija je iz godine u godinu sve teža. Posebno je ukazao na navode Upravnog odbora da Izvještaj nije realan, a da je to potvrdila i revizija. Iznio je mišljenje da Komisija ne može donijeti neke radikalne zaključke po ovom pitanju, jer kakve god zaključke i donese Komisija, oni sigurno neće riješiti sadašnje stanje u Radio-televiziji BiH. Osvrnuo se i na prijedloge da se pokrene stečaj i kazao da to, iako ružno zvuči, može biti opcija za spašavanje preduzeća ako se pokaže da nema drugog načina. Međutim, dodao je da ova komisija svakako nije nadležna za donošenje takve odluke. Na kraju je predložio da Komisija konstatira da je stanje teško i da Izvještaj samo primi k znanju i uputi Domu naroda na razmatranje.

Alma Čolo naglasila je da izvještaj o radu i poslovanju Parlamentarnoj skupštini BiH podnosi Upravni odbor a ne menadžment. Jer, sada je Upravni odbor dostavio izvještaj menadžmenta koji ni Upravni odbor nije usvojio, a traži se ili očekuje da ga Parlamentarna skupština BiH usvoji. Osvrnula se i na iznesene tvrdnje da je revizorski izvještaj negativan, odnosno da je konstatirano da Izvještaj o finansijskom poslovanju nije realan. Citirala je dio mišljenja iz revizorskog izvještaja u kojem stoji da izvještaj prikazuje realno i objektivno finansijski položaj osim onih primjedbi da gubici nisu knjiženi pravilno po godinama, i konstatirala da je to „mišljenje s rezervom“.

U nastavku diskusije Alma Čolo govorila je o problemima koji su proistekli iz smjene generalnog direktora gosp. Agovića. Istakla je da razumije zbog čega je sud donio odluku u vezi s razrješenjem generalnog direktora. Sud je prvo donio presudu da se uvažava žalba gosp. Agovića i da se ukida privremena mjera. Takva odluku suda, po njenom mišljenju, značila je obavezu Upravnog odbora da gosp. Agovića vrati na poziciju s koje je smijenjen, jer je privremena mjera upravo zbog toga ukinuta. Upravni odbor to nije ispoštovao nego je imenovao vršioca dužnosti. Time je Radio-televizija BiH dovedena u situaciju da nema ovlašteno lice, da nema potpisnika, da se ne može potpisati završni račun, da se ne mogu potpisivati dokumenti firme, itd. Takvu situaciju Komisija ne može raz riješiti. Osim toga, gđa Čolo ukazala je i na druge probleme, prije svega na činjenicu da nisu realizirane preporuke koje je dao prethodni menadžment. Nema spremnosti da se poveća RTV pretplata i dalje postoje problemi zbog neplaćanja zakupa satelita, Vijeće ministara BiH, tačnije gosp. Špirić se ogлуšio na to itd. Na kraju je predložila da Komisija donese dva identična zaključka kao što je uradila Komisija za saobraćaj i komunikacije Predstavničkog doma.

S obzirom da nije bilo više prijavljenjih za raspravu, predsjedavajuća Komisije zaključila je raspravu i pozvala sve članove da daju prijedloge zaključaka i da se o njima glasa.

Slobodan Šaraba predložio je dva zaključka:

1. Dom naroda Parlamentarne skupštine BiH traži od Vijeća ministara BiH da osnuje radnu grupu u kojoj bi bili eksperti iz oblasti javnog emitiranja sa zadatkom da procijene usklađenost Zakona o Javnom radio-televizijskom sistemu BiH i Zakona o Javnom radio-televizijskom servisu BiH sa Ustavom BiH i evropskim standardima iz ove oblasti, te da na osnovu toga bude sačinjen prijedlog za eventualne izmjene i dopune ovih zakona.

Sa četiri glasa „za“ i jednim glasom „protiv“ zaključak je usvojen.

2. Dom naroda Parlamentarne skupštine BiH traži od Vijeća ministara BiH da pokrene inicijativu kojom bi se zakonski regulirali odnosi na marketinškom tržištu BiH i javni emiteri zaštitili od monopolističkog i ucjenjivačkog položaja marketinških agencija.

S obzirom da su pojedini članovi Komisije ukazali da je ovaj zaključak veoma sličan zaključku koji je već usvojila Komsija za finansije i budžet Doma naroda, Slobodan Šaraba odustao je od ovog prijedloga zaključka.

Duškanka Majkić podnijela je tri prijedloga zaključka.

1. S obzirom da Izvještaj o radu i poslovanju Radio-televizije BiH ne govori o pozitivnim promjenama u poslovanju, Komisija predlaže Domu naroda da ne usvoji Izvještaj o radu i poslovanju Radio-televizije za 2007. godinu.

Sa dva glasa „za“, dva glasa „protiv“ i jednim "suzdržanim" glasom, prijedlog zaključka nije usvojen.

2. Dom naroda Parlamentarne skupštine BiH zahtijeva od Upravnog odbora Radio-televizije BiH da u svom radu dosljedno poštuje odredbe Zakona o Javnom radio-televizijskom sistemu BiH i Zakona o Javnom radio-televizijskom servisu BiH kao osnovnih zakonskih dokumenata čijim je donošenjem Parlamentarna skupština BiH stvorila okvir za zakonsko djelovanje unutar Javnog radio-televizijskog sistema i Javnog radio-televizijskog servisa BiH.

Sa četiri glasa „za“, bez glasova „protiv“ i jednim "suzdržanim" glasom, prijedlog zaključka je usvojen.

3. Dom naroda predlaže Upravnom odboru da angažuje konsultanstsku kuću koja će utvrditi stvarno finansijsko stanje i procjenu imovine i na osnovu toga donijeti odluku o sanaciji ili likvidaciji Radio-televizije BiH.

Sa dva glasa „za“, dva glasa „protiv“ i jednim suzdržanim glasom prijedlog zaključka nije usvojen.

Adem Ibrahimpašić je podnio jedan prijedlog zaključka.

Dom naroda Parlamentarne skupštine BiH zahtijeva od Upravnog odbora Radio-televizije BiH da u zakonskoj proceduri izabere konsultanstku kuću koja će utvrditi stvarno finansijsko stanje te procijeniti imovinu i na osnovu toga sačiniti plan sanacije i konsolidacije Radio-televizije BiH.

Sa dva glasa „za“, dva glasa „protiv“ i jednim "suzdržanim" glasom, prijedlog zaključka nije usvojen.

Rudo Vidović je, također, podnio jedan prijedlog zaključka.

Komisija je konstatirala da je stanje u Radio-televiziji Bosne i Hercegovine veoma teško, te da postoji niz problema koji opterećuju poslovanje ovog javnog servisa. Komisija je Izvještaj primila k znanju i upućuje ga Domu naroda Parlamentarne skupštine BiH na razmatranje.

Sa tri glasa „za“, jednim glasom „protiv“ i jednim "suzdržanim" glasom, prijedlog zaključka je usvojen.

3. Razmatranje Izvještaja Vijeća ministara BiH o aktivnostima na projektu „Autoput na Koridoru Vc“ i Plan narednih aktivnosti

Predsjedavajuća Komisije Alma Čolo informirala je prisutne da je Ministarstvo prometa i komunikacija BiH kao nadležno ministarstvo pripremilo Izvještaj o aktivnostima na projektu „Autoput na koridoru Vc“ i Plan narednih aktivnosti koji je Vijeće ministara BiH razmatralo i usvojilo na 68. sjednici, 3.12.2008. Izvještaj je dostavljen Parlamentarnoj skupštini BiH 18.12.2008. Dalje je informirala da je Komisija za saobraćaj i komunikacije Predstavničkog doma Parlamentarne skupštine BiH, na 28. sjednici, održanoj 29.1.2009.,

razmatrala Izvještaj i jednoglasno ga podržala. Tom prilikom Komisija je usvojila i tri zaključka koja je uputila Predstavničkom domu PSBiH na usvajanje. Predstavnički dom razmatrao je Izvještaj o aktivnostima na projektu „Autoput na koridoru Vc“ i Plan narednih aktivnosti i usvojio ga na 45. sjednici, 4.2.2009., sa zaključcima koje je predložila Komisija za saobraćaj i komunikacije.

Uvodno obrazloženje o Izvještaju Vijeća ministara BiH o aktivnostima na projektu „Autoput na Koridoru Vc“ i Plan narednih aktivnosti dao je Namik Kupusović, koordinator jedinice za Koridor Vc iz Ministarstvu prometa i komunikacija BiH. Istakao je da je ova jedinica zadužena za provođenje svih aktivnosti na izradi dokumentacije koje prethode otkupu zemljišta i izgradnji projektovanih dionica, kao i za aktivnosti na pripremi osiguranja finansiranja izgradnje autoputa putem kredita, koncesionog ulaganja i kombiniranog modela finansiranja.

Koridor Vc najveći je projekat transportne infrastrukture u Bosni i Hercegovini i jedan od najvažnijih u jugoistočnoj Evropi. Koridor Vc je ogranak panevropskog Koridora Vc koji spaja Budimpeštu s lukom Ploče. Dužina Koridora Vc kroz Bosnu i Hercegovinu je 336 km, od čega je 45 km izgrađeno ili je u izgradnji. Studijom izvodljivosti predviđeno je da se 191 km Koridora Vc izgradi do kraja 2012. godine, a preostalih 145 km do kraja 2017. godine. Institucije Bosne i Hercegovine osigurale su finansijska sredstva za izradu plansko-studijske i projektne dokumentacije. Ekspertni timovi Republike Hrvatske i Bosne i Hercegovine pripremili su Nacrt sporazuma između Vijeća ministara BiH i Vlade Republike Hrvatske o izgradnji međudržavnog mosta na rijeci Savi kod Svilaja i planirano je da se sredstva za izgradnju ovog mosta osiguraju iz sredstava GSM licence. U 2008. godini Bosna i Hercegovina potpisala je četiri kreditna sporazuma s međunarodnim bankama za finansiranje izgradnje Koridora Vc u iznosu od 480 miliona eura. Postoji više uslova koje institucije Bosne i Hercegovine moraju ispuniti da bi sredstva iz ovih kreditnih sporazuma bila operativana, prije svega potrebno je da se usvoji i primjenjuje odluka o naknadi iz goriva u iznosu ne manjem od 0.10 KM po litru namijenjenoj za razvoj mreža autoputeva i da se postigne dogovor o raspodjeli tih sredstava. Također je neophodno da se imenuje nadzorni odbor za praćenje provođenja Projekta Koridor Vc, te da se do kraja 2009. godine Direkcija za autoceste Federacije BiH registriira kao javno preduzeće.

Slobodan Šaraba zatražio je pojašnjenje vezano za odluku o naknadi 0,10 KM koja će se izdvajati iz cijene tečnih goriva te da li to znači i povećanje cijene goriva.

Predstavnik Ministarstva objasnio je da će se iznos ove naknade osigurati bez povećanja cijene goriva, na teret smanjenja marže, i da će to biti prihod entitetskih direkcija za autoputeve. Prihodi prikupljeni na osnovu ove naknade koristit će se za vraćanje anuiteta za kredite, eksproprijaciju i izradu projektne dokumentacije.

Nakon toga u diskusiju se uključio predstavnik Vanjskotrgovinske komore BiH Zijad Sinanović, direktor sektora. Istakao je da je u Zakonu o međunarodnom i međuentitetskom cestovnom prijevozu rečeno da će Vijeće ministara BiH donijeti odluku o naknadama za puteve za strane prijevoznike, u roku od 90 dana. Naglasio je da je taj zakon donesen u maju 2002. i da ni do danas nije donesena ta odluka. To govori da su izgubljena značajna sredstva koja su mogla da se iskoriste za finansiranje autoputa. Istakao je da je potrebno iskoristiti sve zakonske mogućnosti koje nam stoje na raspolaganju.

Dušanka Majkić podržala je mišljenje predstavnika Vanjskotrgovinske komore BiH i uputila ga na zvanično (pismeno) obraćanje Komisiji za sve inicijative, nakon čega će Komisija moći preduzeti aktivnosti s ciljem njihovog rješavanja.

Nakon rasprave, Komisija za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH jednoglasno je usvojila Izvještaj o aktivnostima na projektu „Autoput na Koridoru Vc“ i Plan narednih aktivnosti i predložila Domu naroda Parlamentarne skupštine BiH njegovo usvajanje.

3. Zahtjev Ad hoc komisije za pripremu izmjena i dopuna, kao i prečišćenog teksta Poslovnika Doma naroda za dostavljanje mišljenja o odredbama Poslovnika Doma naroda koje se odnose na stalne komisije Doma naroda Parlamentarne skupštine BiH (čl. 25.-28.)

Predsjedavajuća Komisije informirala je da se obratila svim stalnim komisijama Doma naroda sa zahtjevom za dostavljanje mišljenja o utvrđenim nadležnostima stalnih komisija i dostavljanje eventualnih prijedloga za izmjene i dopune nadležnosti, odnosno eventualne izmjene i dopune u nazivu stalnih komisija. Dalje je podsjetila članove Komisije da je Komisija o promjeni naziva i nadležnosti Komisije za vanjsku i trgovinsku politiku, carine, saobraćaj i komunikacije Doma naroda raspravljala na 9. sjednici, održanoj 16.1.2008., i da je tom prilikom zaključeno da se Kolegiju Doma naroda uputi inicijativa za izmjenu Poslovnika Doma naroda u Odjeljku C (Komisije Doma), odnosno izmjene članova 25. i 27.

Dušanka Majkić predložila je da se prvo razgovara o tome da li ova komisija treba da ostane ovakva ili ne i iznijela svoje mišljenje prema kojem bi Komisija trebalo da se razdvoji u dvije stalne komisije i to tako da se osnuje Komisija za vanjsku i trgovinsku politiku i carine i Komisija za saobraćaj i komunikacije. Raniji prijedlog da se Komisija razdvoji na tri komisije smatra da nije realan, s obzirom na broj delegata u Domu naroda. Međutim, smatra da je prijedlog za razdvajanje na dvije komisije realan. Kao ključni razlog za razdvajanje na dvije komisije navela je predstojeće povećanje obima aktivnosti do kojeg će neminovno doći u procesu usklađivanja bosanskohercegovačkog zakonodavstva sa *acquis communautaire*. Radna tijela Parlamenta treba da budu koncipirana tako da mogu iznijeti teret povećanja poslova do kojega će doći u narednom periodu.

Adem Ibrahimpašić istakao je da je obrazloženje za podjelu Komisije na dvije nove komisije logično ali da bi to istovremeno značilo povećano angažiranje delegata, s obzirom na njihov sadašnji broj.

Alma Čolo također je izrazila mišljenje da ova komisija u sadašnjem obliku ne može opstati, s obzirom na tako široke nadležnosti. Nijedna druga komisija ni u jednom od domova nema ovoliko nadležnosti. Iznijela je drugačiji prijedlog za transformaciju Komisije. Predložila je da Komisija ostane samo kao Komisija za vanjske poslove Doma naroda, a da se poslovi vanjske trgovine i carina te saobraćaj i komunikacije pripoje komisijama identičnog naziva u Predstavničkom domu i da te komisije postanu zajedničke komisije oba doma.

Dušanka Majkić usprotivila se takvom prijedlogu s obrazloženjem da bi se time narušile, odnosno umanjile postojeće kompetencije Doma naroda i da Komisija nema pravo davati takve prijedloge. Ako bi bio prihvaćen prijedlog da se osnuju nove zajedničke komisije, onda bi se takva logika mogla primijeniti na sve komisije u Parlamentu. Dalje je predložila da Komisija uputi prijedlog o podjeli na dvije komisije a da se o prijedlogu gđe Čolo razgovara na sjednici Komisije i na taj način vidi da li ima spremnosti i mogućnosti da se promjene vrše u pravcu tog prijedloga.

Kao kompromis, Adem Ibrahimpašić predložio je da se Ad Hoc komisiji upute oba iznesena prijedloga.

Rudo Vidović istakao je da podržava oba prijedloga.

Nakon rasprave, Komisija je jednoglasno zaključila da se Ad hoc komisiji za pripremu izmjena i dopuna, kao i prečišćenog teksta Poslovnika Doma naroda uputi sljedeće mišljenje:

Komisija za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH smatra da je potrebno da se izvrši razdvajanje ove komisije i osnivanje dvije nove stalne komisije Doma naroda Parlamentarne skupštine BiH, i to: Komisije za vanjsku i trgovinsku politiku i carine i Komisije za saobraćaj i komunikacije.

Komisija smatra da nije potrebno da se vrše izmjene ili dopune postojećih nadležnosti, osim da se izvrši raspodjela postojećih nadležnosti Komisije za vanjsku i trgovinsku politiku, carine, saobraćaj i komunikacije na dvije predložene komisije.

4. Razmatranje zahtjeva Komisije za vanjske poslove Predstavničkog doma PSBiH u vezi s davanjem prijedloga člana Koordinacionog tima za izbor BiH za nestalnu članicu Vijeća sigurnosti UN-a za 2010. godinu;

Predsjedavajuća Komisije je u uvodnom izlaganju informirala prisutne da je Kolegij Predstavničkog doma je na 83. sjednici, 26.1.2009., razmatrao dopis Ministarstva vanjskih poslova BiH u kojem se traži imenovanje jednog člana Parlamentarne skupštine BiH u Koordinacioni tim za izbor BiH za nestalnu članicu Vijeća sigurnosti UN-a, te da je u vezi s tim zadužio Komisiju za vanjske poslove PD da, u saradnji s Komisijom za vanjsku i trgovinsku politiku, carine, saobraćaj i komunikacije Doma naroda, predlože člana Koordinacionog tima.

Nakon toga više informacija u vezi sa zahtjevom Ministarstva vanjskih poslova BiH dao je Sead Avdić, savjetnik u Ministarstvu vanjskih poslova BiH. U svom izlaganju istakao je da je održan sastanak Komisije za vanjske poslove Predstavničkog doma te da je Ministarstvo vanjskih poslova BiH dobilo informaciju da su kolegiji oba doma Parlamentarne skupštine BiH usaglasili ime člana Koordinacionog tima za izbor BiH za nestalnu članicu Vijeća sigurnosti UN-a za 2010. godinu, i da je to Zlatko Lagumdžija. Međutim, Ministarstvo vanjskih poslova BiH nije o tome zvanično obaviješteno, dok se u međuvremenu pojavila nezvanična informacija da je Zlatko Lagumdžija odbio kandidaturu.

Na pitanje Dušanke Majkić o realnim šansama BiH da zaista postane nestalna članica Vijeća sigurnosti UN-a, rekao je da za to postoje realne šanse, te da imamo podršku istočnoevropske grupe zemalja. Naglasio je da u oktobru ove godine Vijeće sigurnosti UN-a odlučuje o tome, te da je neophodno da kandidat za člana Koordinacionog tima iz Parlamentarne skupštine BiH bude imenovan i da se što prije uključi u rad Koordinacionog odbora, kojim predsjedava ambasador Miloš Prica.

Predsjedavajuća Komisije konstatirala je da su se članovi Komisije upoznali sa zahtjevom Ministarstva vanjskih poslova BiH kao i zahtjevom Komisije za vanjske poslove Predstavničkog doma u vezi s imenovanjem predstavnika Parlamentarne skupštine BiH za člana Koordinacionog tima te prodložila da se sačeka inicijativa predsjedavajućeg Komisije za vanjske poslove Predstavničkog doma Matića i da se nakon toga obave konsultacije. Članovi Komisije jednoglasno su podržali ovaj prijedlog.

5. Tekuća pitanja:

- **Zabilješka sa sastanka Komisije za za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH s novoimenovanim šefovima diplomatsko-konzularnih predstavništava BiH, 28.1.2009.**

Članovi Komisije razmotrili su i jednoglasno primili k znanju Zabilješku sa sastanka Komisije za vanjsku i trgovinsku politiku, carine, saobraćaj i komunikacije Doma naroda PSBiH s šefovima diplomatsko-konzularnih predstavništava BiH, održanog 28.1.2009.

Sjednica Komisije završena je u 14,20 sati.

Sekretar Komisije
za vanjsku i trgovinsku politiku,
carine, saobraćaj i komunikacije
Nenad Pandurević

Predsjedavajuća Komisije
za vanjsku i trgovinsku politiku,
carine, saobraćaj i komunikacije
Alma Čolo